

郭襄靖公遺集

郭襄靖公遺集卷之九

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

奏疏

參贊留樞

南京兵部尚書到任謝 恩疏

奏爲恭謝

天恩事臣先任總督兩廣軍務兼理糧餉帶管鹽法兼巡撫廣東地方都察院右都御史兼兵部右侍郎於萬曆十二年正月初一日准吏部咨爲缺官事該本部等衙門會推題奉

聖旨是郭應聘改南京都察院右都御史欽此欽遵於二月十二日前至蒼梧與新任總督兩廣軍務都察院右都御史吳文華交代即日起程至本月二十四日復准吏部咨爲缺官事該本部等衙門會推題奉

聖旨是郭應聘陞南京兵部尚書叅贊機務寫

勅與他欽此欽遵臣即兼程前進至四月二十五日
設案焚香望

闕叩頭謝

恩到任管事恭候

勅書至日叅贊行事外伏念臣本駑駘凡質嶺海孤
蹤遭際

聖明屢膺邊寄涓埃靡效鞭策弗前仰賴

帝德旁敷封疆者定詎期

皇恩下逮

簡命游

頒方聞臺憲之遷旋被戎樞之

召顧留都乃根本重地而兵曹皆軍

國機宜責任匪輕稱塞未易冒茲

殊渥倍切怔營臣敢不淬勵初衷矜持末路協恭治
事期稱鎖鑰之司約已奉公矢殫捐糜之誼庶仰
答

鴻慈於萬一而少伸職分之尋常矣臣無任瞻

天仰

聖感激屏營之至謹具奏

聞

選戰卒增巡軍疏

題爲選戰卒增巡軍以固根本重地事職方清吏
司案呈奉本部議照 留都各營原額正軍一十
二萬餘節年逃亡事故十已七八實在營操僅及
三萬戎伍之虛耗極矣今清勾之令誠嚴而申解
甚少且到衛未久旋多逃亡募補之議誠善而在

官人役空名寄伍者常多戈矛不習緩急無濟除
嚴行各營衛等官遇解到新軍務加存恤毋容凌
虐募補軍丁務精壯毋容在官人役投充外爲今
之計惟有挑選精銳以責選鋒之實似爲切務蓋
貴精不貴多之意也大小教場原設選鋒各二千
名 神機營一千名使皆年壯力强志專藝熟卽
此五千勁卒當前無堅敵矣何外侮之足慮耶乃
今挑選多年陸續更替老弱不一卽與衆伍無殊
何以望其精強練習備捍禦之用哉似應嚴加選

汰專一教練庶不失 題設初意該司即查營軍
選鋒始於何年今再加選汰人情有無便益等因
又奉本部批據提督 神機營營務兼理巡捕南
京後軍都督府僉事侯繼高揭帖開稱南都城廣
民疎巡邏馬步軍二千四百名分爲兩班布散不
周且每年僉換掣取改差人無固志請照營規再
增步軍六百名管隊旗軍一百二十名共足三千
一百二十名以成一枝之數分布巡邏再添坐營
官一員每月朔望照

京師事規入 神機營合操一次每年不得更換掣
改及請給犒賞以示激勸等因并據巡邏把衛總
楊捷等呈稱各職夙夜巡歷勞苦甚於各營乞照
各營把總選鋒衛總給賜家丁紙劄等情奉批該
司議報該本司覆查得大小 神機三營軍士近
已分定七枝內選鋒五千名原係挑選精銳以備
戰兵自萬曆二年至今中間更替數多或壯者已
老或強者已弱或新者未練委宜嚴行選汰以裨
實用且選鋒軍士俱免各項差撥人情無不樂從

又留都城內輪廣六十餘里且多閒曠蒼莽之區盜賊易於竊發巡邏馬步軍二千四百名分爲兩班每班一千二百名分布委難周遍居常不能聯絡遇警豈能追捕應於備兵營內選添巡軍六百名管隊一百二十名共足三千一百二十名以成一枝分布哨守編隊合操永爲定規每年不得換改但巡邏兵旣衆多勢易渙散若都督而下卽爲把衛總不便統馭查得

京師巡邏都督之下設有叅將二員今南都兵止三

分之一不必另設叅將應添坐營官一員專一夜
巡統率把衛總聽巡捕都督節制庶臂指易使本
官員下家丁紙劄照例撥給季終通將有功失事
員役賞戒勸懲及查各營把總每員家丁二名又
月給紙劄銀一兩選鋒衛總家丁一名紙劄五錢
巡邏把總每員止月給紙劄油燭銀九錢衛總止
油燭銀三錢各官夙夜巡邏衝寒冒暑不得規避
近例年終考覈與營官相同至其沾澤未與營官
相等果屬未均相應一體優恤等因通查案呈到

部臣竊惟保障地方之計不外兩端營軍以備外侮巡軍以防內警今營軍雖列七枝而選鋒內多萎靡巡軍雖設兩班而地方不敷分布皆不可不亟爲之所也臣受

命視事以來夙夜兢惕懼無以仰承

德意保釐畿民方將詢求機務次第舉行而此選精銳重巡邏二事正所以弭盜安民詰戎振旅要務方今

聖明御極

皇威遠布雖內外敎寧而無事之防實有事之備也
既經該司覆查前來相應題

請合無將選鋒軍士行管操司官會同各營都督嚴
加點選如衆伍內有年力精壯武藝閑熟者即選
入選鋒如選鋒內有年力萎弱武藝生疎者即汰
入衆伍又於選鋒之中拔其尤者立爲隊長敎督
武藝管操司官按月比試定其等第而賞罰之挑
選完日聽臣會同守備官親行閱驗其巡邏添設
坐營官一員年終本部照例考覈本官員下跟用

軍士一十名馬二匹家丁紙劄照各營坐營官事
例一體撥給本部管操司官會同巡捕都督於備
兵營挑選精壯步軍六百名管隊旗軍一百二十
名共足三千一百二十名以成一枝專責都督侯
繼高分布哨守編隊合操不得復行更易新增巡
軍口糧照舊巡軍例支給季終巡捕都督通將有
功失事員役類開送部覈實有功者量動本部草
場租銀獎賞失事者輕則戒飭重則照依近

題事例究發江操本部管操司官會同巡捕都督每

年將周將巡軍點閱一次汰換老弱巡邏把衛總
紙劄油燭照舊外把總八員每員准收家丁二名
衛總一十六員每員一名每名月支折銀米二石
與巡軍口糧俱照例造冊南京戶部關支夫選鋒
旣加汰練則捍禦有所責成巡軍已成一枝則提
防不致疎略所以保障地方有備無患者庶有藉
乎此也伏乞

勅下該部再加查議覆請

明旨咨行臣等欽遵施行

議處勾補軍伍疏

題爲酌議勾補事宜以便奉行以圖實用事臣等
照得詰戎奮武誠保治長圖而通變宜民亦揀時
急務南都各衛軍士疲困營伍空虛視之

國初原額相懸甚矣近年該本部

題請清勾逃亡充實營伍荷蒙

聖明軫念根本重地俯從所

請嚴行勾解所以飭武備杜禍萌者意甚至也本部
隨即通行各衛查自宣德四年起至萬曆十年止

逃故軍士共六萬四千四百八十六名造冊繳報
兵部覆奉

欽依轉行各省直清軍官嚴勾勒限起解外自去歲
七月至今陸續據北直隸山西陝西河南山東等
省解到新軍計共二千餘名所司之奉法不爲不
謹矣顧所已解者率多尪羸老弱之輩中途病故
者有之妻故而隻身解至者有之解至而無聊自
縊者有之强悍之徒逃而貽累解子者有之其精
壯者着伍未幾旋多逃去如邢芝等已百餘人矣

病而死者如馬萬良等又數十人矣節奉

明旨加意存恤年終考覈令非不嚴及本部時加申飭衛所凡經行員役毋容勒捐需索猶然不免於逃且死者此其故何蓋以六萬四千之軍分勾於各省以一二百年逃亡之久併追於一時人戶動相推調官司勢難致詳僉解拘妻監羈追併不勝其病矣及其拋棄室家荒蕪田地携妻挈子徒步數千里而來饑飽不時水土不習未有不疲且病怨苦而思逃者若不變通酌處則無以濟其法之

所不及而順其情之所不安臣恐責成徒切清解
終難存恤雖勤逃亡益衆而戎伍卒歸於虛耗臣
等之罪亦有不得而辭者傳曰爲政猶調琴瑟甚
者解而更張之變通之謂也臣等再三酌議惟於
清勾之中少寓變通之法使已勾者得易於奉行
已解者稍免於逃竄其於戎政不無少補矣謹以
所當議處者四條冒昧上

請伏望

聖明垂察

勅下兵部從長酌議行臣等欽遵施行軍民幸甚臣等幸甚

計開

一議南北改編竊惟

國初軍衛之設南北交相編發制非不善但此輩原非土著勢必懷歸雖刑之不能禁者况法止調衛乎况逃亡者衆勢難盡調乎是以缺伍清勾隨解隨逃大壞至今明見其弊矣而猶因循不敢輕議者良以版籍之故恐涉更張

耳查得弘治三年該兵部覆題奉

欽依洪武年間北人發極南邊衛南人發極北邊衛
充軍續後清勾北人解去極南者被烟瘴而
死南人解來極北者被苦寒而亡人多畏避
不肯着伍合仍照宣德年間大學士楊士奇
建言各照南北地方編發正德三年議將山
東河南陝西北京原充兩廣雲貴四川福建
湖廣者改補東西北之邊衛嘉靖二十二年
議將山西宣大應解各省者存留本處俱載

軍政條例中尚書顧璘巡撫湖廣時亦曾具奏改編今南京各衛獨不可舉而行之乎合無自今以後除見在各衛所住定年久者照舊充當其未解者除河南山東道里不甚相遠仍舊勾解外如北直隸應勾軍二千三十名陝西應勾軍三千四百六十五名山西應勾軍二千九百四名山後并興和路遼東共四十四名應解南京者俱量改北直隸山陝衛分將南直隸浙江福建湖廣江西廣東

等省應解北者量改編南京衛分照其額定
軍數彼此更換廢地方旣近風氣相宜人情
樂便安土重遷縱有逃亡亦易勾攝一轉移
之間南北軍伍皆得實用矣仍令各州縣暫
造小冊鈐記存照候造冊之年方行改正似
亦無難者奚必盡滯版籍之故哉至於罪犯
充軍應發極邊邊衛者在各省俱有邊遠衛
分併宜就近發遣充伍永爲定例旣免遠解
之累日久子孫亦易清勾仍通行各該衙門

一體施行伏候

聖裁

一議先後起解竊惟法不可縱亦不可急縱之則弛急之則民有所不堪其勢然也今南京應勾之軍數至六萬四千四百有奇一州一縣少者數十名多至一二百名者果皆年遠丁存尚不免於繹騷地方如遠年流移故絕一槩勾索或同圖同里而祖名偶差或同姓同名而戶籍已改展轉攀誣賄詐百出恐刑

併跟捉之下民之不安其生者多矣近如勾
軍楊短何回等各戶告爭至押解南京戶兵
二部查冊竟難定執餘可推也大槩一軍之
所株連者人或數戶戶或數人則此六萬之
軍騷動乎閭閻者當不下二三十萬人一軍
之所起解者妻子長解或四五人則此六萬
之軍跋涉乎道途者當亦不下一二十萬人
遠近人心皇皇擾擾不得不一示分別以便
勾解而免愁嘆之聲也查得南京旗手等衛

自天順年間以前逃故者共二萬九千八百四十九名成化年間以後逃故者共三萬四千六百三十七名合無題

請行清軍衙門分別年分久近以爲先後有司先以近年逃故者着實清勾年終照依原題事例分別舉劾獎戒其天順年間以前者責令有司逐年清查如果戶絕卽行申豁不必一槩嚴併庶法令易遵而地方不致大擾矣伏候

聖裁

一議寬恤屯匠夫清勾之令本爲營伍計也今南京各衛之所勾解者有操軍有運軍有屯軍有匠軍以百名計之在營操者約三四十名已耳運軍無用尚可寄操若屯匠之軍則有失初意甚矣

國初分錦衣等四十二衛軍士屯種於廬鳳滁和之間使之無事則負耒以耕有事則荷戈以戰蓋寓兵於農之意也其後逃亡日衆田土就

荒勢豪乘機侵占屯政大壞實在屯軍止一萬一千七百六十六名至嘉靖二十九年該巡視屯田御史張鑑題奉

欽依將各衛屯田逐一委官清查明白併將各衛舍餘軍餘年力精壯情願頂補本軍者召補頂替名伍永遠承種各給戶由一張聽衛所鈐束子孫聽繼軍役共補過屯軍三萬二千二百八十八名又議立屯營二十六所委官操練每年終查屯軍見在逃亡之數遇有名缺

務要隨即召補具載屯田御史

勅書中經今三十餘年屯田御史遵照

勅書行事未之有改也今各衛不查屯田衙門已有

逐年召補明例仍將遠年逃亡屯軍槩行造

報清勾世遠人亡不惟各省清查之難即解

到一二彼此爭訐勢必奪已召補者所耕田

土給與新軍是在新軍則捨原籍之土地而

遠事於屯耕在屯軍則棄已成之田功而流

移於他業蓋彼此俱病矣旣大拂乎人情且

有違乎明例徒擾州邑無裨戎行此屯軍所當寬恤者也至內官監撮造軍匠七百三十五名本以充工作之役也緣各軍原不諳習技藝凡該監有所成造皆祖匠及另募民匠爲之而此七百三十五名者每軍有妻例給糧八斗隻身四斗八升每月令其納工卯銀二錢二分五釐本部委官一員徵解工部轉解該監給匠充用但軍匠類多貧乏往往徵納不前逃亡殆盡而該監節行催取無從別

措查得應天府原有民匠五百二十名後因
負累之甚該南京署工科事戶科給事中王
蔚題准每民匠月糧三斗折銀一錢五分五
釐扣留南京戶部折作工卯送監給匠今軍
匠之苦與民匠同相應比照將月糧通融折
銀二錢二分五釐解補工卯之數使該監工
作無悞而窮軍亦得稍甦此匠軍所當寬恤
者也今查各省直應勾屯軍共八千九百三
十九名應勾匠軍共一百八十二名合無

請將臣等見造花名文冊咨送兵部轉行各省直清
軍官暫行停勾其屯丁仍聽屯田御史照舊
召補耕種督責操練備緩急之用軍匠工卯
銀兩行戶部將額匠七百三十五名月糧每
名扣銀二錢二分五釐類解工部轉解內官
監收用尚有見在辦納工卯軍人皆本部先
年通融將別項軍人撥補者相應回衛差操
其原逃故軍匠并續有事故者俱免行勾補
是亦通變之一道也伏候

聖裁

一議收補丁壯竊惟政在務實法宜因時南京
軍伍雖減舊額而各衛餘丁并義男女壻外
甥等項載在冊籍者不可勝紀其間豈無膂
力強壯堪荷千鈹者乎萬一有警皆可選而
用之也矧此輩土著已久可無逃亡之虞苟
得月糧無不樂於聽命者查得嘉靖年間本
部尚書張鏊題飭武備將各衛舍餘餘丁挑
選年力精壯者頂補正軍食糧以充各營逃

絕之數萬曆元年本部尚書劉體乾又題請
將各衛在冊餘丁并義男女壻外甥等項不
論祖軍投充揀選精壯准令收軍仍止當本
身一輩以後不得替補今祖軍逃亡本地未
得解補而其義男女壻外甥等之在冊者又
以一輩之例棄之捨見存之壯丁而取足於
遠年之逃故恐亦非通變之術也合無查戶
口冊內本戶雖無餘丁而義男女壻外甥等
頂曾收在冊者果年力精壯許其告補暫役

卽與住勾遇有戶丁起解復役容令改正如
義男女壻外甥等項各丁盡絕卽與申豁庶
地方暫免清勾之擾而行伍不致空缺矣伏
候

聖裁奉

聖旨各衛缺伍年久數多一時併勾不無煩擾這所
議有裨戎政兵部看了來說該兵部覆看得
南京兵部尚書郭應聘等條議南北改編等
四事均於 留都戎政重務有裨老成忠懇

鑿鑿可行誠如我

皇上所嘉納者矣相應開列前件議擬上

請定奪等因萬曆十三年五月十三日本部尚書王
遴等具題十五日奉

聖旨依議行

議復會同館馬匹疏

題爲懇憐首驛衝繁查復原額夫馬以救倒懸以
濟供應事車駕清吏司案呈奉本部送據本司管
理馬政署員外郎事主事鄒雲鵬呈據會同館馬

驢頭館夫劉應鳳等各告稱本館原額上中下馬
四十五匹驢二十五頭館夫五十九名萬曆八年
蒙本部裁革各衙門冗濫差遣具題

量減上馬五匹中馬三匹驢五頭館夫九名各照
額銀扣收部庫待後果有不敷另議增復今思本
館係都會之地差使絡繹每年府部院寺科道等
衙門拜

表并內府二十四衙門供應機房齋進
上用龍袍

神帛鮮品及住劄

欽差內外守備織造司香太監總督刷卷提學巡視
京營屯田京倉上下巡江科道出巡及差人奏事
等項俱討本館馬驢人夫應付每遇差使繁雜揭
借支持甚至賣男鬻女供辦差役苦不勝言況北
京會同館馬驢數百竝無裁減在外水陸驛遞俱
已疏通惟獨本館偏累懇乞垂憐夫馬驢數缺乏
准將前減馬驢館夫照舊查復等情到職看得本
館衝要非但往來走遞之繁進

貢公差之冗冗在南內外文武奉差官員夫馬俱各
取給於斯或遇公差叢集取用數多一馬常雇數
匹一驢常代數頭一夫常覓數名應役之家每每
捐貲稱貸以供差遣本職目覩其艱誠有不容不
爲之議處者伏乞俯察輿情亟議增復緣由呈部
蒙批該司查議隨經本司議得會同館設在都城
各衙門進

貢齎本一應公差員役等項委果叢雜即如往年舊
額猶稱繁苦難支况今裁減之後答應豈能周遍

每遇差繁之時其雇夫雇馬雇驢之費信至數倍若不亟議增復諸役苦累勢必逃竄遲誤

上下公務關係匪細且原題待後不敷另議增復正謂有待於今日者及查每年額解銀數俱扣存部庫若仍復舊額即以其所有給之不必加派於各縣也揆諸事體參諸人情似爲妥當案呈到部臣看得原題裁減夫馬本爲革冗濫從節省之意但今公差日繁供應日急役卒疲憊已甚員外郎鄒雲鵬親覩其艱揭陳於前郎中吳仕詮復加體勘

議呈於後况增復本出原議而錢糧又免加徵反
覆叅詳委宜復舊相應題

請伏乞

勅下該部再加酌議

上請軫念南畿道路衝繁差使困累如果相應容將
上馬五匹中馬三匹驢五頭館夫九名復其原額
以備該館走遞之用候

命下之日咨行臣等欽遵施行庶公差致違誤而
困役亦得少蘇矣

患病乞歸疏

奏爲病軀不勝重任懇

恩放回調理以免曠職事臣本一介草茅仰荷

三朝作養叨塵仕籍由郎署出爲郡守歷藩臬督撫
洊陟今官感激

聖恩誼當捐糜圖報何忍言去緣臣自補外畿三十
載皆在遐方而任封疆之寄爲久夷獠多故啓處
不遑瘴癘蒸薄形神困瘁臣自分孤危無復覩

天日之望矣誤蒙

聖明覃照拔之中臺尋有南樞之

召臣彌自感奮趣赴戎曹冀殫犬馬力報稱萬一也
不謂才微任鉅福過灾生春夏以來氣血寢耗濕
熱交侵瘡患纏綿足膝痠痛即步趨拜伏猶且難
之頃者歷視城垣校閱營壘類皆強勉撐持罷乏
已甚尚安望經營夙夜裨濟艱虞以少效涓埃哉
况江淮有地震之異鄖襄多道殣之民而杼軸告
空兇頑窺釁所至而是臣未敢謂東南地方誠晏
然無慮也

根本之地管鑰之司責任視諸曹不同如臣駑材綿
力鞭策弗堪一至負乘僨轅罪將何以自贖茲臣
隱憂私計尤不容不早自引去爲重地先事之圖
矣謹披瀝下情上瀆

天聽伏望

聖慈原臣之罪亮臣之心

准令放回田里別推才望大臣以充是任則不惟臣
得就調理以盡餘年而秉樞得人陪京可恃以無
恐矣臣不勝激切懇祈之至謹具奏

聞奉

聖旨南都叅贊重寄郭應聘才望素著簡任方殷着
照舊供職吏部知道

犒賞選鋒疏

題爲敷陳營衛切務懇乞

聖明早賜議處以固根本重地事職方清吏司案呈
奉本部送准兵部咨談南京吏科給事中劉一相
奏內一欸豐犒賞以鼓士氣照得北營選鋒軍士
月糧犒賞倍於常卒新江口選鋒除月糧一石外

操院月給銀貳錢今三營選鋒月糧有妻一石隻身六斗視常卒何殊焉夫旣曰選鋒必望其力之驍雄藝之慣習器械之精利而後緩急足恃也苟平時拊循不加而欲其用命於有事也得乎臣愚欲別立科條用示優恤即不能如北營新江之厚當於二季初操每名量給犒銀數錢及每季日操賞內量添選鋒銀一二百兩以備操練加賞仍注意教習視其技藝之高下以爲賞罰之重輕等因該兵部覆議備行南京兵部戶部查照所議從長

計處應用銀糧應於何項動支徑自奏

請定奪覆奉

欽依備咨到部送司案呈到部隨即咨行南京戶部
會同酌議去後續准該部咨稱本部老庫銀兩已
經題貯難以輕動其餘每年折色等銀歲派之數
僅足備每歲之用即今正額錢糧自萬曆八年
起至十一年止盡議

蠲免恐歲儲愈訕支用不繼止有新增屯糧一項銀
除支給行糧外頗有積餘合於此項銀內每歲量

支一千五百兩協濟充賞等因前來該臣等議照
南京三營選鋒之設舊矣近該本部具

題爲選銳卒增巡軍以固根本重地事會同揀選精
壯以足大小二營各二千名 神機營一千名之
數俱免各項差使其每季日操賞銀大小二營各
二百四十七兩有奇 神機營一百三兩有奇俱
於本部草場租銀內動支每遇操期預給該營收
貯比較選鋒及常伍軍士通融給賞今科臣劉一
相奏稱前因無非儲養銳氣責其用命之意但北

營選鋒軍士霜雪寒苦原與南中不同而新江口
選鋒係防守江洋晝夜辛勞亦非內三營之比故
月糧之外從厚犒賞其勢不得不然今三營選鋒
止春秋二操旣免一應差役人皆樂從而戶部歲
儲稱乏難以別行措處臣等再三計議合無三營
選鋒五千名自本年爲始如遇秋操時每名添給
犒銀三錢爲弓矢之資歲計銀一千五百兩即於
南京戶部屯糧銀內動支充給其日操賞銀除原
數外大小教場每季再加銀各一百兩 神機營

每季五十兩二季共加銀五百兩在於本部草場
租銀內支給專謂添賞選鋒軍士之需如此則既
有犒銀以寓優恤之意又加操賞以重校閱之惠
然後嚴令將領注意訓練庶士心益增奮勵而用
命自別尋常矣除行南京戶部尚書傳希摯右侍
郎楊一魁各會議僉同外伏乞

勅下該部再加查議覆請

明旨咨行臣等遵奉施行

議給舍餘糧餉疏

題爲舊京軍貧法弊懇乞

天恩早賜議處以永保治安事職方清吏司案呈案查先奉本部送准兵部咨該南京兵部尚書王遴條奏內一議量增月糧以恤精壯開稱竊照軍以禦暴食以養兵勢本相須而時不容缺者也議者往往掠節省之名而曰養兵曷以糜費爲哉不知軍一名月支糧一石此

國家中正之規間有月支糧六斗四斗三斗者此非隻身單丁即老幼殘疾不堪操練守倉守局者也

軍果精壯即月支糧一石識者尚謂兵強必用食足故今京營及各邊有月支糧二石者家丁是也有月支銀一兩五錢可買糧三四石者南兵是也舉此則南京舍人軍餘不亦甚可恤哉近該南京巡視科道官阮子孝等題稱要將舍人舍餘并旗軍餘丁挑選精壯者照例支給月糧發營操練誠爲充實營伍堪備調遣至計但春操三箇月秋操三箇月每月每名止准支糧四斗其住操月分即停止不支以是爲養以是爲練而欲兵皆精壯以

備戰守何可得耶此外又有巡捕餘丁亦月支糧四斗有守門餘丁僅月支糧三斗此屬均有詰姦禦暴之責而食不充口衣皆穿空臣切愍之一得之愚謂既欲兵皆精壯又欲人心樂於趨役莫如將前項舍人舍餘旗軍餘丁不拘營操巡捕守門但選係精壯者一准量增月糧有妻者一石無妻六斗上操歇操一體支給並與正軍相同惟老幼殘疾者月糧仍照舊例等因該兵部覆議備行南京戶兵二部查照題議事理再加會同逐一計議

停妥徑自具 奏施行等因及先該巡視南京營務南京刑科給事中阮子孝等奏爲敷陳京營切要事宜以固根本重地事內一款議補舍人哨軍丁議將各衛舍人舍餘餘丁挑選精壯發營操備各題奉

欽依緣由到部俱經通行去後向因議行清勾遠年逃故軍士致未會選議覆近該本部尚書郭應聘等題爲酌議勾補事宜以便奉行以圖實用事議將天順年以前逃故軍人二萬九千八百有奇

及屯軍匠軍九千一百有奇俱暫免勾解誠恐解
補軍少營伍不無空虛之慮行委本司署郎中事
主事袁年會同巡視南京營務南京兵科給事中
鍾于淳山西道監察御史田一麟挑選過各衛舍
餘餘丁見年四十以下二十以上共六千八百二
十三名俱精壯土著之人並無無籍之徒投充於
其間者以之充實營伍少補免勾之數具呈本部
尚書郭應聘會同南京外守備臨淮侯李言恭武
靖伯趙光遠點閱分發大小教場 神機備兵浦

子口伍營編入隊伍與正軍一體操練并將原舊操備舍餘餘丁與巡捕守門餘丁共二千一百三十六名通共八千九百五十九名各項月糧一併酌議不拘上操下操一例支糧六斗冬夏賞布各一疋咨行南京戶部查照原行會議隨准該部咨開前項挑選舍餘軍餘不拘上操歇操一例支糧六斗夏冬賞布各一疋折衷已妥無容別議但南京倉糧皆隨時會計一年止足一年支用祇因每年折支二三箇月并正軍逃亡故歷年積有餘剩

實在糧米二百七十二萬止穀數年支放脫或事
起不虞抑時但荒歉徵解不前恐難常繼合將新
增糧石於各省直派剩數內查照派撥解補相應
併議等因前來呈乞酌議 題覆案呈到部臣等
議照兵強而後守固食足而後兵強此必然之理
也今挑選舍餘軍餘以補逃亡之額即頂正軍名
伍所以訓練於無事之時而責其用命於有事之
日也即與正軍一體給之全糧誠不爲過其巡捕
守門餘丁皆有詰姦禦暴之責亦宜量增月糧以

示優恤但糧儲有限別難措處且陸續勾補不覺數之爲多一時選充惟恐餉之難繼審時度勢亦有不得不然者臣等再三計議合無將新選精壯營操舍餘軍餘共六千八百二十三名不拘有妻無妻通融每月給糧六斗其備兵營新江口浦子口舊操舍餘餘丁共八百三名仍係餘丁非頂正軍名伍月糧四斗俱上操歇操一體支給夏冬通各賞布一疋俟各餘操練精熟拔其最者補入選鋒軍內即同選鋒糧賞其巡捕守門一千三百三

十三名旣無操練之勞且原係餘丁名色相應仍舊支糧免議增給如此雖未能盡如原題所議而營操各役視昔已屬優恤庶糧餉不致匱乏而營伍少免於空虛矣除行南京戶部尚書傳希摯右侍郎楊一魁會議僉同外伏乞

勅下該部再加查議覆請

明旨咨行臣等遵奉施行

郭襄靖公遺集卷之九終

郭襄靖公遺集卷之十

甫中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

奏疏

參贊留樞

欽賞謝恩疏

奏爲恭謝

天恩事准本部咨准南京工部咨爲脩理事內開萬曆十三年六月內本部 奏繳 玄武門樓等處脩理工完緣由該工部覆題節奉

聖旨袁洪愈等各賞彩段二表裏鈔二千貫欽此欽遵備咨前來臣應聘在 賞賚之列本年九月三十日據千戶孟翰齎捧前項

欽賞表裏寶鈔到臣臣欽遵祇領望

闕叩頭謝

恩外竊惟 留都爲

皇家根本

大內寔

聖祖燕貽值

作述之重光宜

堂構之兼盡矧

玄武宮漏進膳所憑而

北上門房宿衛攸止皆

關重地可緩繕脩廼渙

綸音特

俞部請工成不日而輪奐聿新制拱

中天而苞桑永繫祇奉

宸衷之獨斷敢希

內帑之普頒臣職忝簡軍勞慙

董役 彩縑分在笥均霑望外之榮 楮幣溢承
筐徒切銘中之感惟有矢堅素節竊附羔羊庶幾
不負丹心免貽濡鵠臣無任感激屏營之至

患病再辭疏

奏爲疾患未瘳職業已曠懇乞

天恩俯容休致以保殘生事本年七月初一日准吏
部咨該臣 奏爲病軀不任懇

恩放回調理以免曠職事奉

聖旨南都叅贊重寄郭應聘素著簡任方殷着照舊

供職吏部知道欽此欽遵備咨到臣捧頌

天言仰惟

皇上憐臣疲駑不即擯棄誠

天地覆幬之德雨露沾被之仁也臣感泣悚惶力疾
視事一面療治期於旦夕痊可以畢犬馬愚衷臣
之大願也但臣久歷炎瘴之區積成濕熱之證患
生足膝藥石遽難奏功以致步履拜伏未能如常
兼之痰火脾胃之疾種種並發飲食少思精神困
憊臣誠爲此身危也臣伏念人臣之義鞠躬盡瘁

苟有利於

社稷何敢愛其髮膚然至於病不任事徒斃其軀於
國家何利哉將事

君守身之道胥失之矣况當

主上聖神敬

天勤民勵精化理都俞喜起之風于今再覩大小臣
工爭自奮勵職業以仰裨

宵旰憂勤迺臣獨以病廢無能少效涓埃酬

主恩萬分之一而猶曳足苟容覲顏素飽有負我

皇上任使盛心罪可勝言哉臣不去則心日不安心不安則病日以甚此臣不得不哀鳴於

君父之前也伏望

聖慈亮察容臣休歸田里從容調治則臣未盡之年
皆

皇上再生之賜也臣當效華封偕擊壤歌詠

聖德於無窮矣臣無任祈籲懇切之至奉

聖旨郭應聘着遵前旨整理戎務以付簡任不准辭

吏部知道

五年考察各營將領疏

奏爲考選軍政官員事臣等遵將萬曆九年起到
十三年止 神機大小教場新江口浦子口池河
并巡邏等營陞調見任將領官員逐一查訪除已
故與先經革任及應存留照舊者俱不敢瀆

奏外訪得原任 神機營選鋒衛總今見任池河把

總南京羽林前衛署指揮僉事雷應元放蕩不羈
沉酣無忌指京費爲名而濫罰馬匹以幫貼拘派
而朘剝軍丁穢跡大彰同儕共鄙原任大教場衛

總今見任大教場把總南京天策衛指揮僉事童
玄恩氣本麤鄙才乏振揚任積書李學之撥制而
役占馬軍縱家僮童慶之需求而賣放士卒操持
不潔偷惰便安原任大教場選鋒衛總今見任池
河把總南京金吾右衛指揮僉事劉承祖謫薄之
材斗筭之器收新軍而每名索銀二錢稱爲公罰
賣軍伴而每季納銀四兩盡入私囊原任 神機
營衛總今見任小教場選鋒衛總南京羽林左衛
指揮僉事宇麟徵年雖青壯行極卑汙縱情流蕩

則騙劉百戶之銀杯而魚休於博塞溺志宣淫則
狎呂五兒之歌妓而覆墜其家貲孀母無依營官
有玷原任新江口衛總今見任 神機營衛總南
京府軍衛指揮同知韓國賢外貌不揚中心多狡
貪婪之跡先播於江營漁獵之謀大肆於衛總原
任新江口衛總今見任遊兵營哨官南京江陰衛
指揮僉事王麒任衛總已見昏庸轉哨官大肆需
索剋減兵糧經陳杞總之覺發久離信地致洗江
防之究懲原任大教場衛總今見任東城巡邏把

總薛守成年雖壯而才則庸任方新而志已怠任
積識李忠之撥制而月扣軍糧狎同輩劉汝華之
嬉遊而曠廢職業見任大教場衛總南京金吾左
衛指揮僉事陳弘道貌陋心姦才疎力憊摧老病
之親詎思烏哺索疲困之卒惟肆狼貪見任大教
場衛總南京羽林左衛指揮僉事盧實性本庸愚
才復疎淺當機一籌莫展垂老百計是營見任小
教場衛總南京留守後衛指揮僉事童蒙古性麤
氣傲才劣行虧科索旗軍致叔父斃於杖比荒湛

狂藥忍媚母困於饑寒見任新江口衛總南京武
德衛指揮同知潘應文恣科求有罰班之例任需
索有銷卯之名怨議已多年力何取見任新江口
衛總南京鷹揚衛指揮僉事盧翰才本樗櫟年逼
桑榆雖久歷於戎行詎復堪乎營務見任浦子口
衛總南京和陽衛指揮僉事宇一元性資鄙陋智
識昏庸惟朘削之是圖曾怨讟之知恤見任池河
衛總南京飛熊衛副千戶吳應科年暮而操脩弗
飭才庸而韜畧罔知科索習以爲常懲戒恬不知

改見任池河哨總南京飛熊衛副千戶張岐訓練
罔習科索無厭久甘暴棄之流何濟緩急之用見
任池河哨總南京飛熊衛百戶劉棟性本貪淫行
復刁險襲伯職而棄母不養忍矣秉心憑積書而
黷貨有聲蕩然名檢見任巡邏東城衛總南京興
武衛副千戶曹金偃倮象恭庸瑣小器軍丁馬甫
等受害非一家人曹貴等索財多端見任巡邏東
城衛總南京府軍左衛指揮僉事許宗處心偷薄
操行卑汙納收月錢徐鉞之告許可證需求常例

王鑾之興訟有因見任巡邏西城衛總南京羽林
前衛指揮使楊先春狡僞存心貪淫成性負吏典
之借券而追比不償勒把軍之常規而黷賄無忌
見任巡邏北城衛總南京羽林右衛副千戶張嗣
教年雖強壯行實貪婪同巡軍溫虎挾騙把總鉄
印法紀何存縱家僮張興需索把軍銀錢官箴罔
顧見任備兵營掌號南京龍江左衛千戶宋維兆
甘心沉湎肆志科求制行無取於片長守官不聞
乎一善見任新江口管火藥南京興武衛百戶高

遷貌既卑猥而不揚才復委靡而難振惟甘一醉之富何知七伐之嚴見任新江口管馬南京留守後衛指揮僉事孫承蔭年力旣衰而營規廢弛操持復肆而軍士怨尤見任浦子口管鼓南京橫海衛百戶劉蔭爵年力衰頽心性庸鄙操脩有玷招同輩之譏嘲差撥失均歛軍丁之怨訕以上諸臣俱應革任回衛者也見任備兵營把總南京水軍右衛指揮僉事彭大舉性本狐疑曾處事之能勇行招物議惟積弊之相沿動不免於多尤守未至

於大壞一官而七營通轄才豈能堪連試而九矢
不虛枝難輕棄此一臣者所當聽調別用勉勵後
效者也內把總雷應元童玄恩劉承祖薛守成彭
大舉例該本年終會同論劾另行具

奏併乞

勅下兵部再加查訪如果臣言不謬將雷應元等革
任回衛彭大舉聽調別用庶考選公而法紀肅矣
條議船政疏

題爲船差困敝勢漸不支敬陳切要事宜以裨時

政事車駕清吏司案呈奉本部送據本司管船廠
主事倪凍揭呈前事內開本職蒙委管理船政已
經二年竊見差役日繁弊害日滋軍甲困累家破
身亡若不稍議調停誠恐後患不測謹將事體重
大者條具呈請批行車駕清吏司酌報備行到司
談署司事主事孫秉陽細加覆議委足以蘇民困
而釐弊端其議官守等五事乞照題

請等因到部臣等竊惟 留都諸曹船務最劇弊孔
最多而軍甲之困苦最甚臣等所蒿目隱心久矣

東華先生集 卷一 九
固未易盡議汰革以杜浮冗之端亦不忍徒事因循以重軍民之累除本部職掌所得專行者隨宜區畫不敢一一輕瀆

天聽茲將所議官守差使支放木料出則伍事相應開列

上陳伏乞

勅下該部再加查議如果臣言不謬擬議

上請定奪行本部欽遵施行則軍民幸甚臣等幸甚計開

一議官守照得船政設三廠把總歲終會同科道舉劾蓋所以專事權而示激勵也然黃船廠專管黃船是矣差撥船隻皆由管船主事則撥船廠爲虛設乃以快平船之修理者屬之而新造者則屬之造船廠因修多而造少又令造船廠管收木植而馬船則屬之江濟二衛又多以江濟二衛掌印官兼管造撥二廠稱名無謂行事矛盾其失一也估驗之時造船廠欲多造撥船廠欲多修意見不同事

體掣肘其失二也木植係江濟二衛及造撥
二廠共用之物而止使一官總收收者不盡關
心用者更多藉口其失三也廠繁於衛而把
總尊於指揮但掌印五年黃選而把總遇缺
推除故有衛已調簡而仍總廠務者尊卑繁
簡各乖其序其失四也舉勅專爲船政向因
江濟掌印多兼造撥把總而舉刺及之致今
偶有不兼把總者遂不與舉勅是管船同而
激勸異其失五也合無將撥船廠改爲快船

廠以錦衣等四十衛快平船屬之照黃船廠
事例於四十衛內選掌印指揮之賢能者帶
管造船廠改爲馬船廠江濟二衛掌印官各
帶管馬船赴廠修造以上指揮四員皆以本
銜兼該廠把總名色一體舉効木植亦照油
麻事例計數分買則事權一而激勵明去五
失而就二善計之便者也其委官員數向屬
太繁以後江濟各設五員錦衣等四十衛各
設一員減去二十餘員以免官多事擾之弊

尤爲便益伏乞

聖裁

一議差使照得各船三年一差而修造春秋二案太約一船三年之內料價工食口糧使費不下千金馬船仰給於官猶之可也快平黃船皆係編審名爲有力實則貧軍而奉差人員前站經手又視之爲奇貨多端剝害非刑榜掠無所不至一當此差則身家不可保矣
見今

上供難緩差使日煩故或今歲而預撥明年或臨春而預提秋案徃者猶有休息今則迄無寧期矣夫一船之內有朋役幫甲餘丁無慮百十人總計殆六七萬家此六七萬家皆皇皇焉思畢其命者也根本之地而使軍窮至此可不爲寒心哉查得嘉靖六年節奉

世宗皇帝聖旨查進貢起數可省則省可併則併如起數是定額難以省併裝運之時照例着科道官兵部官監視務要儘船裝載不許多撥

欽此嘉靖九年及三十二年節奉

欽定額例萬曆二年又經題

准裁減船隻故每年修造之船止足以應常差之數

今

上供已出額外而常差又復求增以致預撥預提日

積月累數年之後將何以支合無通查常

貢船差及公侯伯進京悉遵

欽定額例其近日奉

旨增取者或同時起運則併差一官不必多委難以

併差者比照相同事例酌量加撥仍聽本部
司官會同科道官嚴行監視務要儘船裝載
陞調內臣不拘是何衙門各止撥船一隻身
已在此者遺下行李聽內守備衙門查船附
載不必槩給其馬快兩項船隻四六均撥前
站經手照萬曆七年題

准事例赴部卯酉部給印票付小甲收執如有指稱
等弊許填註票內回日赴部銷查凡此皆恪
遵

明旨並非擅議減縮而寬一分則民受一分之賜矣
若因循不節恐勢終不給反誤

上供是非所以善後也再照大馬船止供下江差使
與小馬船進京者苦樂較異乃差至淮徐等
處者亦皆撥小馬船而扣追半差銀兩是以
千金之費行數百里而止追還一二十金在
官爲虛糜而在船則多差利歸於本甲而害
增於衆人也合查凡係徐州而下換船般壩
者悉撥大馬船亦均勞逸之一義也伏乞

聖裁

一議支放照得馬船水夫原係南直隸江西湖廣等處僉解後經題

准就近召募而工食則各該州縣照數徵解本部照數散給是謂銀與人之無損益也非謂解與放之不通融也奈何失議法之意而啓弊害之端必欲以本縣解到銀兩給所補該縣水夫而勢終不能久待則創爲借支名色有臨差而借者矣有役過而借者矣有差役繁苦

而借者矣有修造重大而借者矣有因拖欠
官銀而借者矣又有暫借預借虛數待補而
朦乾沒者矣又有幾年無解而徑行改編者
矣夫以萬人之衆而名色多端又如此查核
可否聽之衛官出入緩急憑之胥吏事體錯
雜文移浩繁豈能一一而綜核之乎冊查蕪
湖黃梅黃安瀘溪興安等縣原無水夫而歲
徵解銀一千七百餘兩當塗縣歲支銀六千
餘兩而止編二千餘兩則立法之意原自通

融况借支已非本處所解而改編則并其冊籍而更之矣顧猶執不敢通融之說使貧困者嗷嗷待餉而積猾乘之上下其手竊以爲非策也合無總計出入通融支放凡改編借支暫借預借名色一切革除每年見夫若干支銀若干指掌了然而各夫以時支給所以杜姦竇而澤貧民者非細故也伏乞

聖裁

一議木料照得船工所用楠木爲急而杉木次

之乃杉木無減折之例又當時給價故商人
夤緣告納以致買多積久朽爛不堪楠木頗
爲難得係查工部稅單計數派買而反過爲
掇尅旣減其疵病矣又恐心有麻腐乃扣價
十一俟用完之日而後給發以致商人往往
畏避杉木苦多楠木苦少杉木之害在小甲
楠木之害在商人二者皆弊也夫木心之蠹
商人亦不得而知乃使之守待於數年之後
已非人情矣及查每年所減麻心價銀業亦

無幾乃致臨期缺木則必廣行召買或減疵
病或寬丈尺計之常價十增二三以其所增
當其所減何止倍蓰而拘拏保家督責經紀
紛紛四出擾害多端勢不得已則在官姑收
不堪之物以取盈小甲強領不堪之物以抵
數料既不備用亦易朽公私兩弊照然甚明
又小甲陸續告領本部陸續批查官役留難
姦甲夤緣弊端叢生莫可殫述頃者清理見
在杉木三年之內不復收買每年所省何止

萬金合著爲例以後如遇應用杉木皆先一年預案呈堂批准收買買足之日即呈堂停止其楠木除疵病減價外免其扣留而於派買之額量行加增在商人免守候之苦而在本部免召買之累豈非兩利之道哉木頭鑿官匠姓名隱匿疵病者許本甲呈究給木之時查明各船等第扣算應領木植并油麻釘鍋等項總開一單召集各甲拈闌給發則終年之所擾擾者頃刻可畢而刁難濫收之弊

不革而自除矣伏乞

聖裁

一議出則照得修造各船其工料銀兩皆有定
則向由小甲陸續告領俟通完之日委官查
刷凡所領逾則者復委官追還其間增減情
弊擢髮不足數卽每案所追出則大約不下
二三千兩秤頭火耗小甲之加納者十三而
委官侵漁該衛之解部者十一拖延不納毋
慮數十年

蠲免則爲委官之資清查則爲各甲之擾弊非一日
矣夫旣與而復追不完而議免議免而不盡
皆弊孔也木植扣價油麻計數總填一單拈
闔給散自無出則何用查追如有額外告增
及冒破餘剩等項徑於應領銀內查扣何用
委官近談臣等批行查扣約四千金小甲欣
然而錢糧清肅如使委官追解恐十年未必
能了而姦弊亦不知其何極也查得嘉靖四
十二年起至萬曆八年止見今清查

蠲免之後尚欠五百餘兩多係委官侵匿但有事係祖父而物故貽患有身家困極而無可賠償清查稍嚴則將各甲免過之數指作應追肆行追呼上德不究此輩雖罪無可宥併望悉從

蠲豁以廣

朝廷曠蕩之恩自萬曆九年起到十一年止共約三千餘兩先經委追而工食亦先領訖無可查扣合將各官該管逐一通查開註手冊立限

追比無令拖延乾沒其十二年以後悉照近
法出則冒破餘剩等銀馬船於工食快平船
於行糧楂柴皆於料價預行查扣以免委追
則官無虛糜民沾實惠委官之事益簡而冗
員信乎其可減矣伏乞

聖裁

考滿疏

奏爲給由事臣見年六十七歲福建興化府莆田
縣人由進士嘉靖三十年四月除授戶部山西清

吏司主事三十五年三月陞本司署員外郎事主
事本年四月陞本部廣東清吏司署郎中事主事
三十六年二月陞廣西南寧府知府四十一年二
月陞四川按察司整飭威茂兵備副使四十三年
三月陞廣東布政司左叅政隆慶元年八月陞廣
西按察司按察使二年七月陞廣西布政司右布
政使四年四月陞本司左布政使五年七月給由
間八月內陞都察院右副都御史巡撫廣西地方
六年三月十一日爲議殄積惡巨寇以靖地方以

復縣治事兵部題覆征剿古田功次蒙

恩於本職上陞俸一級萬曆元年三月初五日爲蕩
平府江積惡巨寇飛報全捷事兵部題覆征剿府
江功次蒙

恩陞俸一級萬曆二年四月十三日爲仰仗

天威討平倡惡叛徭事兵部題覆征剿懷遠功次蒙
恩陞俸一級二年十月初五日三年考滿本年閏十
二月二十八日爲擒寇糾黨爲患官兵乘勝剿平
通論功罪以昭勸懲事兵部題覆剿過洛容柳城

陽朔永寧永福等處功次蒙

恩陞兵部右侍郎兼都察院右僉都御史照舊巡撫
三年十一月陞戶部右侍郎十二月初十日交代
離任四年二月丁母憂回籍守制服闋八年九月
內起兵部右侍郎兼都察院右僉都御史仍巡撫
廣西地方本年十二月十八日到任十年九月十
二日六年考滿授正議大夫資治尹十一年正月
內陞都察院右都御史兼兵部右侍郎總督兩廣
軍務兼理糧餉帶管鹽法兼巡撫廣東地方二月

二十八日吏部移咨到臣時因廣東東山兵變流劫廣西陸川縣等處前任督臣陳瑞聞報致仕緣兩省俱係臣督屬地方卽於二十八日在平樂府接管兩廣事務隨移劉梧鎮三月初三日交代萬曆十一年十二月內改南京都察院右都御史掌院事十二年正月內陞今職臣於二月十二日前至蒼梧與新任督臣吳文華交代三月初八日離任在廣東南雄府出境除交代至出境共二十六日不計自十一年一月二十八日起至十二年二

月十二日止連閏實歷俸一年零一十五日本年
四月二十五日至南京兵部到任管事至十四年
三月初九日止連閏實歷俸一年一十一箇月零
一十五通前正三品上陞俸三級自萬曆二年四
月十三日起至今止歷正一品俸共六年一十一
箇月零八日內計正二品俸共三十六箇月三年
考滿例應給由緣臣係領

勅官員未敢擅離職守乞

勅吏部查議惟復別有

定奪奉

聖旨着就彼復職

三次告病疏

奏爲積病轉深新患增劇懇乞

聖慈憐察早

賜生還事萬曆十三年十月十一日准吏部咨該臣
奏爲疾患未瘳職業已曠懇

恩休致以保殘生事奉

聖旨郭應聘着遵前旨整理戎務以副簡任不准辭

吏部知道欽此欽遵備咨到臣臣荷

德如天措躬無地伏念臣本淩椽之才不堪肩負蒲
柳之質尤易摧頽衰病交侵鞭策不進即顯加擯
斥分所宜然誤蒙

皇上優容復留供職臣感激切衷勉強視事非惟不
敢言去亦不忍言去矣詎知積之久而疾愈加治
之急而血益耗膝筋腫痛行步艱危上下堂堦必
假人協扶方免傾跌每酬接稍頻輒疼楚終日不
能措履此固諸臣所共見者然猶謂支體病也迺

入春以來痰火盛發頭目暈眩脾胃困傷肌肉內
銷形神外槁日延多醫診療皆謂患起腹心而諸
疾隨之病勢至此必非藥石所能奏功日月所可
計效也矧留都重地叅贊重寄地曠而防疎軍
疲而習橫戎伍之弗飭法令之因循所由來久矣
皇上所以委任臣者何如所以責成臣者何如而臣
以眇然疾病之身支吾歲月憂思徒切補苴無能
臣微軀不足深惜誤軍

國大計負

皇上委任責成

盛心臣萬死不足贖矣宋臣周敦頤有言時清未忍
遽辭官臣辭官於

清時其心誠大有不得已者矣貪饕之耻切瘝負之
懼深也臣聞

明主使臣匪徒優之祿秩固將勵之廉隅臣自揣病
已莫支而猶苟延不亟引去必至身名俱隳進退
失據爲士論不容而後去之將舉臣生平盡棄

皇上亦何取於臣而徒玷班行爲也爲此不避

斧鉞披瀝再 陳伏乞

聖明憫臣迫切至情早

賜放歸就醫調治一息尚存寸衷未泯

天恩浩蕩詎敢一日忘耶臣無任隕越悚息祈懇之
至奉

聖旨郭應聘着不妨部事調理不准辭吏部知道
四次告病疏

奏爲病勢危篤瀝血哀鳴懇

恩早全骸骨事臣以衰憊殘生曠瘵深咎屢

乞罷歸未蒙

聖慈俞允竊聞人臣之義以不欺爲主本臣揣無片
長足以仰稱

任使惟有蠢朴不欺一念庶幾可矢

天地而報

聖明如或病未切膚偷安自便欺也病久廢職隱忍
貪饕尤欺也

日月鑒照斧鉞難逃臣不敢也臣私自憐孱然眇軀
嬰茲百疢自冬春至今時無一刻不呻吟自心腹

及四肢無一處不耗損痰火壅塞瞶如聾聵不能
升履厥部隨趨班行者已非旬月此譬之霜後之
草風前之燭寧復望強起撐持以圖萬一效哉夫
一職之吏日暮途窮貪戀升斗猶以爲羞矧卿列
非竊祿之官樞鑰豈苟安之寄而臣以柴槁骨立
臥病奄奄卽

浩蕩天恩垂仁株朽而旁觀竊訾且謂

清世容茲牽位素食之臣何以令衆庶見也夫人肩
負勝仆自知臣自知病之必不可支身之必不足

用矣有此迫切至情不亟籲呼於

君父之前是臣重自欺而負

皇上也臣一旦早填溝壑盡瘁無裨孤

覆露之洪慈冒

雷霆之威譴臣甚懼焉伏乞

皇上憫臣久病難延察臣平生不欺特容休致俾臣
得生復鄉族沒安首丘

皇上所以曲全臣者啣環結草無能爲報矣臣無任
隕越俟

命之至疏下吏部覆奉

聖旨郭應聘准回籍調理痊可之日撫按官具奏起
用

五次乞歸疏

奏爲危病已極旦夕可虞哀

懇歸骸事臣緣久病屢瀝血誠上

請仰荷

聖慈不加

斧鉞復准臣以調理臣感極涕零隕軀靡報但臣犬

馬下愚雖有戀

主之心苦無從心之力人疾痛則籲

天呼父母我

皇上

尊天也

親父母也臣危迫真情有不得不籲呼而

懇訴者臣自春夏以來病勢日劇一日強任步履頽
然而傾強進飲食喀然而吐多醫診視僉謂五臟
俱病六脉皆危暑濕復侵喘息莫保即倍加調理

難望向痊之期矣人臣事

君鞠躬盡瘁斃而後已臣私衷固嘗以此自盟然未
有病廢牀褥奄奄不振而猶可藉稱茲義以饗榮
肥決性命而負

皇上委任者此臣哀鳴再三言盡而繼之泣也除臣
自本月初一日具疏去後即日咨部住支俸糧不
敢關領外伏乞

天恩憐察早

賜罷歸俾寸息螻生不至客骸無寄則

皇上覆露洪慈誠更懸枯朽矣臣無任悚越祈懇俟
命之至時五疏連上方得

旨下部議以四疏

批允

應詔陳言疏

題爲仰體

宸衷敷陳安民四議以重根本以弭災沴事臣等頃

閱邸報伏奉

聖諭以風霾示異

垂軫民艱特許所司條議政事共圖修省是誠

帝王敬

天憂民之

盛心也臣等職司樞省叨守

留都責任匪輕凌兢

彌切竊覩風霾之變本出

天心仁愛徃時間亦有之然未有

京師連日塵塞延及南

都城猶經晝夜者此皆

臣等職業不修機務久曠所致也犬馬愚衷不揣
條爲四事上瀆

天聽曰推廣德意曰保固郊圻曰特拔廉吏曰激勸
武臣皆臣等職掌所關履歷所及其有係於生民
利病非淺眇也伏乞

皇上俯采末議

特賜施行庶幾民生可安

天變可回臣等不勝榮幸矣

計開

一推廣德意照得黃馬快船以備運進

宗廟薦新及

上供品物之用先年物有常品船有定數軍民未嘗
稱疲其後傳奉乘坐動以數十計各船甲夫
及有司驛遞受累不可勝言近年偶因差多
萬曆十二年分撥過船二百四十五隻至十
三年分撥過船三百六十一隻則加撥一百
一十六隻矣夫一船用軍甲一十五名而各
戶幫丁則以百計科歛使費每船不啻百金
一值此差未有不傾貲蕩產而繼之流移死
亡者其修造之費與夫沿途夫役之擾難以

悉數舉一船而百船可推軍民之困極矣我
皇上臨蒞以來洞燭民瘼諸凡供應之需悉從樽節
德意惓惓自畿甸迨于郡國民靡不鼓舞更甦惟此
船差疲苦之狀未敢遽達者仰體我

皇上孝友至情因

慈寧宮新成及

公主成婚大慶制造器用勢不容已然此特一時之
暫耳自茲而後我

皇上必且軫念而圖所以省之者矣以臣等愚慮竊

謂

上用龍袍等服不容緩矣而螺甸

龍牀戲金膳卓之類皆精細完固用之深宮可多年
無壞者不可省乎

薦新茶笋鮓魚等品不可已矣而枇杷之無味青梅
之酸澁必不堪進

御者不可省乎竹木等器或以時取用矣而銅鐵器
物皆堅緻經久不必常造者不可省乎杉條
板枋等料難以盡減矣而板櫃空箱之類不

可省乎其他輸運數多臣等未敢一一縷陳
惟我

皇上宏擴

仁恩益敦

儉德

勅下所司虛心查理有不切於

上供者悉行停止有可用於久遠及積之而有餘羨

者暫免取用酌爲定制

頒示遵行庶軍民之困少甦而

德意覃敷於無外矣伏乞

聖裁

一保固郊圻照得重門擊柝無非所以衛民生也南都內城延袤甚廣防守最難先年專設巡捕都督一員提督官軍二千四百名近該臣等議添坐營官一員旗軍七百二十名分布巡緝防禦已有備矣至於外城尤極寥廓在東北則駕壑凌山難於策應在西南則列柵積土易於傾頽四城相去踰百里而遙每

隅動隔數十里惟附城地方僅有商民輳聚
餘皆荒原曠野杳無人居向因營伍空虛未
經設有官軍防守以致強徒藏匿時有竊掠
之虞幸遇

聖神在上江寧海晏萑蒿無警萬一偶值凶荒流民
就食兇頑竊伏窺伺空虛肆行爲患城廂居
民及往來行旅其能安生樂業免意外之患
哉近該臣等暫撥選鋒軍四百名輪流四隅
防守但山原荒僻林木蓊翳軍稀地廣分布

不敷思患預防不容不汲汲者合無於大小
教場 神機三營按月輪撥選鋒軍士六百
名馬軍二百名共八百名以才力千百戶八
員分領輪班四隅夜巡防禦其上河濱江等
處仍行操江衙門添撥巡江軍兵協同隄備
其承委千百戶有勤慎盡職及地方無虞者
容臣等分別選充衛總等官以償其勞庶郊
圻寧靖居民賴以安堵矣伏乞

聖裁

一特拔廉吏夫民之不安其生者牧之失職也
牧之失職莫甚於貪貪者怙威漁獵其政必
苛惟廉潔之吏則自公明平恕實政實心未
有不子愛斯民者故廉者當官第一義也顧
廉吏難得亦難知榮利之溺人久矣童而習
之壯而籌之無非榮肥之計甫一入官紛華
漸染服食輿馬僕從之飾爲費不貲往往已
負貸累百及其抵任有不取償於民者乎間
有素知自好砥礪名檢省費裕民而儀節簿

書之間多不售知於上者何蓋愛民之與集
事約已之與事人勢每相妨故也以故貞介
之吏惴惴孤特悶悶無奇即撫按司道非熟
察其治行心事未必能知之真者甚之雌黃
無辨淹抑居多或且劣遷罷去矣比其歸也
彼牟利蠶官者豐饒充積足以貽子孫惠親
族結郡邑誇閭里而貧窶廉吏寥寥索居或
垂老無以自給至於子孫負薪室人交謫自
非特立不拔卓然不以利害動心者烏能自

持不變哉故廉吏難得亦難知也方今

聖明在上懲貪之令誠嚴矣其有廉能異等者亦多在旌擢之列矣然未嘗一著特拔之令明示上意所嚮恐巧拙難察名實易淆貞士易心貪夫得志無以仰副

皇上愛民求治

盛心臣等謂宜通行各撫按官嚴加諮訪務取廉靖大節實惠及民者大省二三人小省一二人不問出身品格以歷俸三年爲率每歲於十

身事文公遺集 卷一
一月內公同薦舉至部部覈其實即於年終
特一題

請推用或擢之要職或處之清秩以風示有位其有
濫舉不公者責在撫按著爲功令歲以爲常
使天下臣僚曉然知某吏之廉撫按以廉舉
銓部以廉推則士風漸回吏治競勸田里自
無愁嘆之聲矣伏乞

聖裁

一激勸武臣竊惟

國家任將將使之保疆土安生靈也廼今之將領間
有剝軍肥已釀釁殃民者其罰固不容貸要
非可盡督過武人也蓋將領黜陟視撫按舉
刺而各屬者則又撫按之所寄耳目也在各
屬廉訪自有公道而將領率多承望顏色曲
意逢迎凡守備遷都司都司遷叅遊叅遊遷
總兵履任之初贊儀酒席費已累百而節序
生辰慶賀之餽且復不貲况其他趨承結納
之費又難以悉數者此皆何從而得哉文吏

苞苴必取之民武臣賄結必取之軍勢也頻
年以來豎旗椎牛激變流毒詎獨人心好亂
致之良有繇也即粵往事可爲明監兵變民
殘其爲豈止一州一邑而已哉臣等請行各
撫按官嚴加體訪各將領有不務潔已恤下
巧賂行私者特加叅究其一切謁見交接諸
儀盡行禁絕仍嚴諭各屬之於將領以至公
相與以直道相成毋得偏任好惡以爲註考
低昂庶廉慎者得以自安貪朘者不敢自肆

未必非撫軍保民之一術也伏乞

聖裁奉

聖旨青梅枇杷係薦新品物裝載起運

先朝自有定規着照舊行但不許附搭私貨及例外
需索騷擾驛遞其餘依擬隨談吏部尚書楊
魏等覆奉

聖旨有司官廉潔素聞的撫按官務加意咨訪
奏薦你部裏核實從優升擢以風吏治

郭襄靖公遺集卷之十終